

東文選

百二十三

内閣文庫		
番號	漢	17777
冊數	130 (123)	
函號	圖	116 1



Blank page with a faint rectangular border and ghosting of text from the reverse side.

Blank page with a faint horizontal line near the top.

東文選卷之一百二十三

墓誌

守太保金紫光祿大夫門下侍郎平章事修
文殿大學士監修國史判禮部事翰林院事
太子太保致仕贈謚文順公墓誌銘并序

李需

公姓李諱奎報字春卿黃驪縣人也考諱允綏皇
戶部郎中母金氏金壤縣人也以公故封金蘭郡
君蔚珍縣尉諱施政之女也公九歲能屬文至十
五六洽聞強記凡著述不做古人陳語平生自

名唐白時人指之曰走筆李唐白歲已酉於名宰
相柳公權座下中司馬試第一明年赴禮部試於
三場試日貢舉負重其名今飲宣醞數四盃稍酣
下筆未精其科稍劣欲辭之更舉以嚴君切責亦
無舊倒辭不得謂賀客曰科第雖下豈不是三四
度鑄門生者乎丁巳冢宰趙公求仁等文儒四相
聯名上劄子薦公於闕下劄子爲不平者所竊遂
寢登第之十年出補全州管記屢抑通判不法因
被訴解職後館翰等儒官薦人每以公爲之首故
於丁卯權補翰林院明年即真壬申正月除千牛

衛錄事參軍事出院六月以兼直復院十二月不
踐七品爲司宰丞仍兼直院乙亥直拜右正言歷
左右司諫己卯出爲桂陽府副使一年以禮部郎
中起居注見召自後歷大僕少卿寶文閣待制將
作監國子祭酒翰林侍講學士判衛尉事於九年
之間其遷轉如此庚寅以無妄流于狴島其時以
同罪被流者三人皆正直敢言之達官也辛卯蒙
宥還京師時達旦來侵公以散官凡講和文字皆
任之壬辰四月起爲正議大夫判秘書省事實文
閣學士慶成府詹事自入參至於是職除補外一

年皆兼典誥癸巳六月拜銀青光祿大夫樞密院副使右散騎常侍寶文閣學士十二月入相爲金紫光祿大夫知門下省事戶部尚書集賢殿大學士判禮部事乙未十二月爲叅知政事修文殿大學士判戶部事太子太保冬十月上表乞退上遣近臣敦諭令復起公不得已起視事又乞退固切上重違其志以守太保門下侍郎平章事修文殿大學士監修國史判禮部事翰林院事太子太保致仕嘗一典成均三闡禮闈所選多韻士自解位來以詩酒自娛尚讀楞嚴頌在九卷亦國有大冊

異朝書表等事無所不爲越辛丑七月得微恙時之當國大臣連遣名醫問診取公所著文集命工雕刻欲令公眼見事巨未畢至九月初二日卒于私第享年七十四上哀悼勅有司令百官會葬贈謚曰文順公噫公之官爵次序既列於前其瑞應行事之迹敢闕于後公之生數月惡瘡滿身面目皆爛乳媪出置門外有一老父過視之曰此兒不啻萬金宜善護養媪走報家君君疑其神人數路追之不得此神物護公於襁褓中也公之欲赴司馬試夢見著磁鍊緇布衣入群飲堂上傍人曰此

二十八宿也公驚悚再拜問今年試席捷否有一人指一人曰彼乃奎星宜就問之公就問未聞其言而寤俄復夢其人來報子必占魁頭此天機但勿洩耳前名仁底因改今名赴試果中第一此靈曜之攝公於名教中也壬戌東京叛遣三軍討之軍幕欲以散官及第充修制負戰者危事皆以計避之公獨慨然曰予雖懦怯避國難非人也遂從軍此公之勇於義也戊寅於八關會侍御宴禮數未半有一宰相促罷之公曰君賜也不可取次處分雖因此被流此公之執法不撓也所謂達旦者

頑如禽獸奏之以鈞天廣樂而不足以開其曾投之以隋珠和璧而不足以顏及聞公之文字事意惻然有感所諭皆從此公之至誠能動無情者也嫺大府卿晉昇第二女生四男二女長曰灌先公沒曰涵今為知洪州事副使曰澄慶仙店錄事曰濟西大悲院錄事女長適入內侍掖庭內謁者監李惟信次適內侍慶禧宮錄事高伯挺於戲墓銘之作尚矣其功名顯顯為世所尚然後為之蓋將使後之人知曠世之上有雄偉不常者矣雖其人雄偉不常而銘不得其人則不若無之之為

愈也予拙於爲文公於平日從容之際每稱吾之
沒也子其銘乎其嗣子涵述公之意書來請銘不
得已銘之曰

江左汾陽海東孔子溫良恭儉哀榮終始七十已
前與世爲賢玉樓作記於公細事斡旋元氣是公
之位七十以後爲天所有人望未厭天取不廉天
奪其真地得厥身焉得爲二在天在地其人茫茫
所留文章亦恐六丁雷電取將鳩集工徒勒之金
石一鏡云亡天子憫惻爰命有司宅名山側原野
昞昞峯巒翼翼山旣靈兮子孫萬億

皇亮高麗故通憲大夫知密直司事右常侍
上護軍崔公墓誌銘

崔瀼

公諱雲字蒙叟其先東州昌原縣人也十世祖諱
俊邕仕國初有功爲大師三重大匡傳至曾孫諱
夷爲開府儀同三司謚曰譽肅譽肅生金紫光祿
大夫諱惟清謚曰文淑文淑生門下平章諱誥謚
曰文懿文懿生尚書左僕射諱宗梓僕射生中書
平章諱昱謚曰文信文信生奉翊大夫諱文立奉
翊公姬樞副洪公諱縉之女是生公世以忠顯珪
組蟬聯門望藹然公生十五歲舉中司馬試實至

元己丑也元貞丙申補都齋庫判官屬籍內侍大
德己亥換武資以神虎衛別將別差牽龍行首庚
子拜左右衛將軍壬寅復文資授朝顯大夫軍簿
摠郎賜金紫俄改典理摠郎判司盈署事至大戊
申又換武拜左右衛大護軍己酉出爲羅州牧使
皇慶壬子徙知鐵原府延祐甲寅移知公州秋復
知鐵原府尋免丙辰復官拜正尹陞元尹至治辛
酉省冗官隨例罷泰定乙丑四月起授通憲大夫
知密直司事右常侍上護軍至七月庚午以疾卒
春秋五十一公儀表甚偉性直且愿平生事佛謹

念佛經佛菩薩名號日有常課未嘗以他故墮廢
處家嚴肅人莫有敢犯及其居官臨民若處家然
大德癸卯以世家子隨王璵宿衛闕庭號都魯花
而璵因太尉王以遭讒疊有非覲心至丁未春事
發璵及黨與皆誅竄而公獨以不附拜大護軍至
治中樂旣之後謀擾東社卿士畏勢從風而靡公
又不與焉及下密直之命人咸以舉得其人然拜
官數月病不能興嗚呼豈非命也哉公娶故僉議
宰相宋公諱玠之女早卒後嫁大護軍任公諱綬
之女封晉陽郡夫人以是年八月甲申葬于城東

大德山之良原公無子任夫人於予為姨母因嘗受恩葬不可闕文遂最績而銘之銘曰善積福厚源深流長魁然而偉克傳芳兮何任不又厥施未光何德不紹祚不昌兮孰尸此貴悠悠上蒼瀆筆臨窆滂滂兮

壽寧翁主金氏墓誌

金氏為貴族蓋起新羅之初俗傳金犢降之自天取以為姓又言自以小昊金天之後因氏焉子孫享國又至敬順王傳遇本國神聖王誕興知天命有歸納王自附其宗屬多內徙蒙恩被位代著忠

勤愈遠而愈大以盛近有國相諱鳳毛門下平章生門下平章諱台瑞平章生樞密副使諱慶孫樞副生密直承旨諱信承旨受尹氏女父諱璠判大府監故壽寧翁主其季女也年十四以右姓而賢媿于王氏諱昱故藥城府院大君寔顯王弟四子文王之母弟平壤公諱基十世孫也世附近屬克襲公候伯父帶方公諱澈在世祖皇帝時率國子弟宿衛于內天子嘉其勞寵賚歲至累百翁主年未三十已寡而三子一女稚且幼既皆教育成立至于抱孫長珣淮安府院君次瑀昌原府院大君

次琇樂浪君孫有八人曰証爲保寧君曰讜曰譔
爲正尹曰詞曰邁餘俱幼延祐至治間有旨索王
氏女而女入其選今適河南等處行中書省左丞
室烈問封靖安翁主迺鍾愛當其遠送憂懣成
疾自後時已時作至元統三年病殆藥不效越九
月乙酉卒年五十五先此東人子女被刮西去無
虛年雖王親之貴不得匿母子一離杳無會期痛
入骨髓至於感疾隕謝者非止一二天下孰有至
寃過是哉今天子用御史言制禁之一方老幼喜
際仁明不知手舞足蹈者獨恨翁主未及而至於

斯也嗚呼悲夫用是月甲辰葬大德原祔大君也
其襄事王命有司官庇之而淮安昌原二君執喪
如禮其季在都下不及焉二君好書愛客有承平
貴公子之風且習家國禮文典故王氏取宗法者
歸之豈非慈訓有方而致之然耶皇慶二年王始
受封即位之日淮安君陪侍左右禮無違者覃恩
及親於是錫壽寧之號繼命越月供支視長翁主
亦特恩也士議金氏旣媿大君其稱謂不宜與宗
女同其必有能辨之者予客長君久而性又魯於
其徵銘無敢辭直敘氏族顛末而及其士議無有

隱也銘曰

山壯其址水美其濱有吉者兆有安者墳孰藏孰
祔維主維君千載之下尚考斯文

唐城郡夫人洪氏墓誌

故延興君杏山老先生有孫名文瑤以其客西原
鄭誦狀先夫人之行來泣而言曰惟先生嘗與吾
父與吾舅俱有年契吾母之藏不可無銘非先生
誰謁焉子曰嗚呼其然鄙文安足惜按唐城洪氏
爲東方望族祖諱子藩相忠烈王爲國大宰十五
年位僉議中贊考諱敬階其先積官至贊成事夫

人年十三選歸朴氏爲杏山家婦實匡靖大夫前
政堂文學遠之妻封唐城郡夫人長子仁龍故版
圖正郎次子即文瑤爲典儀寺丞次德龍東部副
令次壽龍千牛衛別將次天龍綏陵直女配王氏
璉爲益興君夫人次嫁士族爲散貧許齡妻夫人
之生在至元戊子至後至元丙子春秋四十有九
而病卒以七月辛酉葬以十一月甲戌宅兆某山
之原其葬也仁龍已卒而政堂公赴輦下不及臨
悲哉銘曰

粵若洪宗貴擅天東匪積匪厚曷殷而豐維文維

武有德有功力贊青社世濟以忠大宰之孫有夫
人美幼奉迺親愛鍾衆子爰擇所從適于朴氏自
其入門舅姑以喜既敦女範又婉婦儀承事夫子
以箴以規董治家政有備無虧亦克多慶二女五
兒謂言夫人享祿未艾胡括其身年則不逮夫子
出游歸也無侍泉路幽幽留恨千載嗚呼哀哉

故杞城君尹公墓誌

公諱莘傑字伊之初以文學輔王於江陵府逮王
嗣位驟擢登宰府身爲舊臣年七十二後至元丁
丑二月二十四日病卒夫人朱氏以予嘗友其姪

暉俾暉來請曰妾事夫子五十四年今亡矣不幸
無子獨葬不可以緩將卜用三月十三日行事願
刻文納隧以圖其不朽惟君之託焉予與暉厚安
可拒之公之先雞林杞溪縣人蓋其始由鄉舉而
入仕曾祖良庇故檢校詹事祖維楨故閣門祗候
考翊故監察史祖及考皆登科前輩有稱其文者
監察公嫺壽城賓氏女生于五人公爲長生卅歲
舉司馬試中魁卅五赴禮闈擢乙科至元卅一年
任南京留守司錄罷秩國學學諭轉四門大學博
士遷崇慶府丞大德十一年拜左正言左司諫左

史郎皆帶知製教至大元年革官爲右獻納江陵
府翊善成均樂正階奉善大夫皇慶元年轉典儀
副令選部議郎知製教階奉常延祐元年累遷至
奉順大夫密直司右代言藝文提學知製教同知
春秋館事三年拜通憲大夫密直副使兼選部典
書遷同知密直知密直密直使陞藝文大提學知
春秋館階匡靖又錫號純誠輔理功臣泰定元年
拜大匡三司使進賢館大提學上護軍冬封杞城
君階陞重大匡公資嚴重訥於言人望之若泥塑
莫知其中何有也大德間爲學官時執政以博士

只占一經多非其人聞於王嚴其選必通六經者
然後除之公獨以兼明得補見稱於一時太尉先
王因舉以傳王善事父子兩王久主銓選不以自
意輕重之皆目爲長者自謝事後遂閉門杜絕賓
客常塊然獨處不問外事如是十餘年而終嗚呼
公可謂篤慎君子者矣朱氏考諱悅謚文節忠烈
王時名大夫也公喪朱氏命公姪衡希甫二人主
焉又命其姪暉佐之其皆從理命也歟銘曰
予於天下之理未敢自謂其窮蓋亦粗知其如是
而已獨於人之有子與無其不可理推而知矣當

謂賢者有後而却無何不肖者宜絕而寔蕃乎此
予所以反覆三思而未得其辭者也今夫尹氏之
喪予又不覺有言嗚呼公有猶子二人焉亦豈云
公祀之不存

有元故武德將軍西京等處水手軍萬戶兼
提調征東行中書省都鎮撫司事高麗宰相
元公墓誌

土京之南距城三十里有山蜿蜒若行若伏若顧
而住水自艮涓涓潛洩至坤流爲溝瀆合大江入
于海背山面水宅得其勢不曰蓄德之丘乎茲故

征東萬戶宰相元公之藏藏用後至元丁丑六月
丁酉其里人崔某受諸孤之謁不敢拒直敘公且
爲銘詩以慰其孤之心焉敘曰公諱忠字正甫先
世蓋新羅北原人十一代祖克猷始仕本國爲正
議大夫祖諱傳相忠烈王爲僉議中贊謚文純考
諱瓘故僉議贊成事大夫人金氏封樂浪郡故承
旨諱信之女也公生於至元二十七年庚寅八歲
以廕補東面都監判官十八始召入事太尉先於
京師之邸擢授禮賓內給事日見寵愛賜姓王氏
改名曰鑄遷中門副使轉典符令司僕正穠華右

司尹階由奉常至奉順大夫而王益欲貴異之特除密直代言公辭曰臣齒少無知驟登三品取譏多矣若夫喉舌之任清望攸屬願乞擇人因忤王旨命復其姓名降職知鐵州促登之實至大三年八月也理鐵四年政簡而民便之皇慶二年王及今王歸國公迎拜鴨江上待遇如初命從歸王京授典儀今兼中門副使密直代言世子右司尹知總部事延祐三年拜通憲大夫密直副使左常侍上護軍七年陞密直使階匡靖尋出爲商議評理至治元年從王朝天子所時太尉王有吐蕃之行

又見留京師傾危之徒謀覆宗社從行大臣亦皆革面勢至不測公獨左右於王終始無二心朝廷識者稱之至泰定元年太尉王得西迴王復爵授公推誠佐理功臣重大匡僉議贊成事判民部事上護軍明年王就國父王臨辭目王曰元忠是世祿舊家且連外戚近又盡匡救之力非他臣比宜聽其言又戒公曰介亦未肩乃心以輔於王然而自歸國後言入見踈閑居五年至順元年前王嗣封起公任以前職陞判軍簿監察司事而今王入朝冬公奉賀年表赴都至三年王又復位而前王

入朝因替職留都下元統二年欽受宣命帶虎符
爲武德將軍西京等處水手軍萬戶兼提調征東
都鎮撫司事至後至元二年奉徽政院差使乘駟
東歸自是見事至無可奈何而志在求田問舍而
已明年遘疾召醫無驗至五月己酉不起春秋四
十有八公天性端實胥無堂府處事之變若有學
然其始辭代言意在忌滿至治戴君又執不移之
節事出誠心俱亦可尚一時之人皆謂之良宰相
而方強遽止嗚呼其不謂之命也而何媿室洪氏
封南陽郡夫人考故南陽府院君諱全於王德妃

爲女兄也男三人曰顥前興威衛護軍曰翊備巡
衛別將曰顥未仕女五人長適親禦軍別將金光
利次適前左右衛護軍洪瑜次適管高麗軍萬戶
羅英傑次適正尹王諤爲國宗季幼在室銘曰
吁其道無偏物難以兩全得位又得壽豈可多責
天公旣貴富矣所未究在年安得知命者與之論
自然

故密直副使致仕朴公墓誌

公諱華姓朴氏先世密城郡籍曾祖奇輔嘗以中
軍錄事死於國事官至大觀殿直贈某官祖洪升

故衛尉注簿同正贈衛尉丞父誠故檢校軍器監
贈禮賓尹禮賓府君娶陰竹安氏女封陰平郡夫
人是生公實元朝憲宗皇帝第二年壬子歲也至
元十五年由典理司書負任全州臨陂縣尉罷秩
入內侍積年勞歷板積密直供驛司醞署令紫雲
坊判官至大三年拜司憲糾正出使慶尚道照刷
諸州架閣文卷摘發無隱被劾者側自反為所攻
見免延祐三年長子仁幹赴召太尉潘王邸起以
選部散郎出知慶原府尋致仕泰定元年仁幹從
太尉王迴自吐蕃於是又起任廣州牧明年以通

憲大夫密直副使上護軍致仕至後至元二年正
月十二日病卒享年八十有五越三月八日葬王
京東大德山感恩寺之北麓夫人趙氏封金堤郡
為故相文良公諱簡之姊也先公四年而卒子男
五人女二人仁幹登庚子科又中乙卯應舉試魁
盡誠秉義翊贊功臣匡靖大夫僉議評理見任漢
陽府尹仁祉辛未科司設署令仁祀左右衛散員
仁翊軍簿佐郎仁宇乙卯科知丹陽郡事女嫁中
門祗候柳韶叔圖佐郎徐珥孫男有六人女二人
公性恭勤莅事惟謹而廉於進取其處家教諸幼

槩以慈祥必勸之從學曰人無學無以立苟有過則又嚴加切責故五子奉承不敢怠忽至於三人登科皆以良能見稱而其長公從先王於絕域艱險萬狀主耳忘軀卒就功名蓋由義方夙激而成之也少從仕官雖低迴未達晚因子貴乃得高資厚祿以養年及九秩而終嗚呼又多望乎哉予聞死事者其後必大亦其先報不騫也歟銘曰嗚呼公之次子仁祉在大德六禩嘗與予同舉司馬試爲進士距今三十有四年矣予旣與其子而爲友則不得不拜公猶諸父故其長公弟畜我我

視其弟又自處以兄其誰曰不可是以公之一門父子第昆於歿於存義密情惇茲其歸土宜有銘我秉其筆尚無媿于幽明

故政堂文學李公墓誌

人稟陰陽以生生爲氣聚散則爲死其間窮達得喪脩短遲疾亦各因其所稟無可怪者苟委其然不加以脩則其卒與草木同腐泯焉無聞又非所謂參二儀妙萬物者矣古之死而不死者匪德則功如大山靜而不動人知膚寸之興澤周四海之謂德事機之會雷風相盪振民塗炭利在社稷之

謂功是則身幽而道彌著事遠而名愈彰千載之下日月爭光尚何平昔出處險易之足論哉余老矣所閱者多矣方見炎炎赫赫可愛可畏曾不旋踵淪謝已盡未及問其行業俱可哀已越若三韓宰相李公雅爲一國所稱尚而余又嘗從容後者宜軫其憚而其孤謁以隧道之文則安敢自重而拒之乎公之始仕在忠烈王時太尉王已引以爲屬因久任羈勒之勞致位高顯及結今王之知特置政府待以文學與評治道替遇前王復仍厥任凡事四王每承寵接勝如前日自非詞采風流有

動人主疇克如是耶公諱彥冲字立之先世清之全義縣人爲國近時名宰諱混謚文莊公猶子也故鷹敷軍大將軍諱什故直文翰署贈大司成諱子蘆爲公祖考也故檢校軍器監金惟銑之女封永嘉郡夫人爲公妣也公舉壬辰司馬試中魁又登甲午年第自入內侍興信宮錄事累轉軍簿佐郎正獻大夫大司成進賢館提學知製教通憲大夫檢校選部典書行典儀令平壤道存撫使行平壤尹慶尚道鎮邊使行金海牧內徙開城府尹改左常侍判繕工寺密直副使上護軍匡靖大夫政

堂文學僉議評理藝文大提學知春秋館事爲公
平日所歷官也金氏封化平郡故僉議評理諱禧
之女洪氏封江寧郡今王京等處巡軍萬戶綏之
女爲公兩夫人也金先而洪繼前神虎衛中郎將
光起前衛郎將光翊前典儀寺注簿俟傑上元方
成童三寶纔十歲爲公子也見任僉議贊成事閔
祥正管高麗軍千戶李乙年前備巡衛別將元詡
昌陵直尹希甫爲公壻也又三女處而幼歲癸酉
月日爲公生也歲戊寅月癸亥日庚戌爲公卒也
是歲月乙丑日丁酉爲公葬也銘曰

見君子之未亡有神氣兮敷敷謂言福祿久彌昌
恨君子之已亡討大空兮芒芒信乎人生不可常

全柏軒墓誌

至元大德間上有天子之明四海乂安而太師忠
烈王以世勲懿戚之重坐鎮東方三十有五年是
時士習忠厚不勸自修其登天朝者已不在論降
而仕於王國人皆謹飭恥爲浮薄邪僻之行自三
二十年來俗風日潰無隄可遏間有舉其當時事
者莫不嗤點以爲固然見遺老典刑猶在近又相
繼隕謝風流頓盡嗚呼可勝嘆也哉故僉議宰相

全公其逮事先王者公謹厚君子人也諱信字而立先世天安府籍太僕少卿諱世柱閣門祗候贈左僕射諱仁亮密直使大寶文諱昇公三世祖父也先夫人崔氏大宰文清公諱滋之孫封齊安郡公之始仕用父任大德辛丑以內侍內衣直長赴禮闈登科明年除崇慶府丞仍豫政房官再轉爲祕書郎甲辰試國學直講賜服金紫丁未出爲安東府判官至大己酉以典儀副令召階加奉常大夫三改官爲摠郎議郎辛亥出知金海府明年移成安府又二年移水原府延祐甲寅以司憲掌令

召轉讞部選部議郎丁巳授寶文閣提學奉順大夫判內府寺肅寧府右司尹知製教知民部提舉有備倉兼選軍別監使己未出尹雞林府辛酉徙牧福州至泰定甲子免至順庚午起拜監察大夫進賢館大提學上護軍階奉翊明年罷監察爲同知密直司事商議會議都監事壬申又罷閑居八年而歿實後至元己卯七月七日也春秋六十有四夫人李氏封上黨郡版圖摠郎諱昌祐之女先卒又媿金氏封咸昌郡神虎衛大護軍諱孝進之女男成安爲司儀署丞次出家名希璨爲曹溪僧

次佛奴未仕女壻前宗簿令韓大淳次壻行中書
省知印李冲仁次幼孫一人亦幼公之先密直在
先王時處邇密掌題品人稱其平及公繼入又以
克肖見重未幾王倦親政公出爲郡後數更官雖
至華顯而其政迹多在於外民去益思最後主憲
府發老賊數人抑隸豎擅勢欲焚其元役之籍以
脫者稍振頰網而未一年罷公凡莅事務盡已而
以嚴重處之故請謁不得行其家貧又不以生產
爲意嗚呼此所以爲君子者矣晚自號柏軒以寓
歲寒後凋之意與舜齋竹軒益齋三先生交甚懽

每相會不以予爲狂鄙引與游故得接從容焉成
安事卜用八月二十八日將舉柩遷葬京東禪興
寺之後洞南距夫人李氏之墓若干步見託以銘
其安敢辭銘曰

噫予之文奚以自秘亦或爲人刻銘于隧意在重
違詞豈無媿追惟公生恥蹈非義第短於才書懼
未備泉臺冥冥尚視不異

崔太監墓誌

予性嬾而怯於鬪憶在十年時見誣於一隸豎得
幸於王者雖予之嬾不得不一往見之則時賢士

大夫咸在客次其門如市少頃豎出客延拜曲膝
猶恐爲後予謂士不當如是欲以禮相見豎謾視
之遂上馬不顧而去予且媿且恨而退曰事來旣
非意雖無辨奚傷聞崔密直日接於王言無不納
克著時譽或有勸令謁而別白之予從而候於門
墻之側密直望見予於衆人之中特降位次先爲
之禮問所以來意乃曲爲之地時豎勢方熾而抑
之甚力故事終於不直而已然感密直無爲先容
而接納士流有古義俠風自是每往每見殊禮密
直王國官其仕天子之朝位三品今而遽然予獨

不念之哉宜受其孤之屬論次行實而爲之文以
寓予之悲也公諱安道姓崔氏小字那海先世海
州人後徙龍州因占籍其昭穆則遠不可考曾祖
諱光爲州副戶長祖諱大富始仕爲檢校大將軍
考諱玄爲匡靖大夫檢校僉議評理上護軍用公
貴朝廷贈朝請大夫大都路同知驍騎尉追封大
興縣男妣金氏追封大興縣君至大元年公年十
五以散員擢爲郎將延祐四年拜軍階奉常大
夫賜服金紫陞累大護軍上護軍階三轉至正順
泰定四年主鷹揚軍判官至順九年登副密

直司階奉翊尋改監察大夫同知密直司事錫協
謀同德功臣之號又受勅于朝征東行省左右司
員外郎二年奉旨入朝克宿衛元統元年特除中
尚監丞官奉議大夫至大二年轉太府監少監官
朝請六年轉本監太監官中議凡官京師九年
三轉官再奉詔書為鄉國榮前以至順三年後以
至元五年明年春已使事欲還朝而感疾七月而
卒年四十有七實庚辰三月廿七日公幼穎隨朝
請公事太尉潘王于京邸遂通三國語敘為先王
官屬而服事久用其勞賜田一百結奴婢一十口

至治中先王為不臣所構留京師公執鞫無二心
賜田二百結奴婢二十口泰定初朝廷採畔人言
議置征東省官例同天下而公與故相金怡等力
辨能止之論其功賜田一百結奴婢一十口以逮
嗣王莅國驟拜密直之除倚任無居右者又至順
閒今上在海上供御所需出私力為多後正宸極
錫賚甚厚蒙降璽書凡土田產業人勿得侵奪其
官于朝實基於此為睿觀此槩足見其為人他不
論也妻具氏故奉翊大夫諱藝之女也亦以公貴
封博陵郡君生四男四女男長曰濡今上護軍次

曰源今護軍次曰淑臣次曰文丘俱未仕女長適
前護軍印璫次適前郎將金有溫次適前別將林
熙載季未有適是五月葬公于某地之原禮也銘
曰
仕王國爲王之臣仕天子之朝爲天子之臣彼輕
此重曾何足計乎吾身古語云有一國之士有天
下之士才非有兼人其孰能如此惜也慮甚長而
年則不長所未可恃者其曰不在於蒼蒼其曰不
在於蒼蒼

故司憲持平金君墓誌銘

東方人性多慢又不力學以養氣故或圖隨世立
身飽煖妻孥庸人是之而有乖於君子之論至如
明義利審出處不以人之是非爲其榮辱者蓋無
之也矧屬衰季士無定議順福逆禍入主出奴之
際迺能中行獨復介然自處則不曰廉士哉若愚
溪金君其近之矣君近代名學士鈍村公季子也
初太尉王爲世子鈍村爲傅以其二子俱見王特
愛君待之有殊禮後嗣位擢任監察史轉典簿寺
丞時以君舊臣且賢咸期大用適以事觸忤內豎
之黠者因貶海島連年困躓勢不克堪而君夷然

若甘心焉及歸屏處家園時有賓客至則置酒鼓琴賦詩自娛不復以名宦爲慮如是者殆十五年至泰定乙丑今王迴自都慨然有意反正授君通直郎司憲持平強起之視事數月士林有望肅清焉適炎客居中弄權蔑視東士至擅放憲府牢禁君對辨於王門語甚激烈反爲所擊遂移病不出家居如初於是受屈者不得伸其冤而君子竊嘆其去矣去年秋忽遇疾患忘藥治之平至前月疾復作一日而卒嗚呼哀哉君性資剛正詩與字畫俱有家法與人交一以信愈久而愈不可襲也人

以君抱志大高不能小敗迺止於此是俗子自論非所論於君也夫士生斯世有遇有不遇遇則其道行蒙施者博不遇則其身退自得者全然則遇不遇迺在於人之幸不幸介胡有損益於我哉君字元龜諱瑞庭後改爲開物嘗舉進士不第自號愚溪其先福州義城縣人祖諱閔官至監察御史考則鈍村公諱暄官至政堂文學妣李氏御史諱方煦之女也君再娠生一男五女男銛權知典校寺校勘女適某官某次適某次適某二幼未有歸君生以至元癸酉十月庚戌卒以泰定丁卯二月

東文選卷之一百二十三
戊戌葬以是年三月壬寅卜兆于某山之原君不
以俗士待我而命其子來學於予故謹爲之銘銘
曰
可能者學也行也不可能者位也年也惟君子然
後取可能者而力爲之舍不可能者而付之天也
嗚呼愚溪尚何慊焉

東文選卷之一百二十三



